

LIA MAKLOKEK

Rai-Timór nia futuru depende maka'as ba Timor-oan nia kapasidade iha área Siénsia Naturál no Matemátika. Ita-nia dezvoltimentu sustentavel, ita-nia rekursu petróleu no seluk tan, ita-nia infraestrutura, ita-nia sistema médiku, ita-nia atividade emprezáriu no finansas: hotu-hotu ne'e depende ba ema ne'ebé iha kapasidade no matenek boot iha área Siénsia Naturál no Matemátika.


Edukasaun iha nivel sekundáriu no superiór depende ba baze iha nivel Ensinu Báziku. Dezde 2015 Timór hahú ona uza kurríkulu foun ba nivel pre-eskolár to'o Siklu 2. Kurríkulu ne'e dezvoltolve rasik iha rai laran ho ekipa boot ne'ebé kompostu hosi peritu balu hosi rai-li'ur no maioria Timor-oan. Iha dixiplina Siénsia Naturál no Matemátika, kurríkulu foun fó dalan ba manorin sira halo prátika barak, sempre ho estudante sira serbisu hamutuk iha grupu laran, no sempre halo ligasaun metin ho moris loroloron no estudante sira-nia esperiénsia rasik. Ami-nia esperansa katak ho revizaun kurríkulu ne'e ba Siklu 3, estudante sira hosi Siklu 3 mós bele aproveita hosi pedagojia di'ak ne'e.

Ha'u rasik vizita instituisaun internasionál *La Main a la Pate* iha Paris, Fransa atu aprende hosi sira-nia programa no esperiénsia. Ha'u observa katak iha rai barak, boot no ki'ik, hahú ona uza maneira ativu no aproveita prátika simples barak atu hanorin, tanba sira hetan rezultadu ne'ebé di'ak, katak estudante sira komprende duni no iha interese aas ba materiál sira-ne'e.

Ne'e-duni Ministériu Edukasaun halo revizaun espesiál ba kurríkulu Siénsia Naturál no Matemátika ba Siklu 3 hodi prodús kalendáriu, Matadalan, no Manuál Prátika tuir kurríkulu no livru-testu ofisiál ba manorin sira. Nune'e, manorin sira bele uza livru sira-ne'e atu asegura katak sira hanorin matéria tuir kurríkulu, maibé ho maneira no pedagojia ne'ebé ativu no efetivu tebes. Hanesan ne'e prosesu hanorin-aprendizajen bele provoka estudante nia interese no criatividade hodi aprende Siénsia Naturál no Matemátika ho di'ak.

Ho kurríkulu Siénsia Naturál no Matemátika sira-ne'ebé reformadu no revizadu ona hosi Siklu 1 to'o Siklu 3, ami espera katak estudante sira sei aprende ho pedagojia ativa dezde ki'ikoan to'o boot. Ministériu Edukasaun halo investimentu boot hodi fornese formasaun kona-ba uza métodu sira-ne'e ba profesór/a sira, no sei kontinua halo esforsu importante ne'e to'o manorin sira hotu la'ós komprende de'it, maibé sei UZA téknika sira-ne'e ho efetivu. Ho mudansa sira-ne'e, ha'u fiar katak ita-nia rai doben bele sai lider rejionál iha área Siénsia Naturál no Matemátika iha tempu badak nia laran.

Dili, 1 Jullu 2015



Dulce de Jesus Soares
Ministra Edukasaun Interina